

Vegn interessai han giu la caschun da visitar la «conditoria.swiss»

TujetschVIVAcultura ha envidau ils 15 d'avrel 2023 ad ina occurrenza cun ina guida ella conditoria da Reto Schmid a Dulezi/Gonda.



Ella stizun han Marcel e Reto Schmid beneventau ils participonts e participontas, pressapauc miez indigens e l'otra mesadad da lungatg tudestg. Gerau Daniel Schmid ha benventau en num dils organisaturs da TujetschVIVAcultura. Ord motivs higienics ein ussa tuts vegni uniformai cun ina blusa alva ed in schurmetg dils cavels en color cotschna. Cun quella mundura fuorman tuts ussa ina unitad, quella da schar presentar il Reto la fatschenta.

Entuorn ina meisa cun numerus products ord sia fatschenta fa Reto enconuscent a nus ses products, ina cronologia e historia dils products tochen al di dad oz cun schizun products novissims ch'ei aunc gnanc sin fiera. Atgnamein hagi la producziun da dultschergnem entschiet cun la petta da nuschs grischuna. La pussevividad da crear novs products seigi quasi senza fin ed era giavischada dils clients, denton era da numerusas fatschentas e consorzis gronds e pigns, naziunals ed internaziunals. Il Reto sa fascinar cun siu raquintar ed ins sto esser bein presents, pertgei ch'el tschontscha sco ils biars tuatschins ualti spert. Basta, la presentaziun da ses products ha fascinau ed aschia ein era naschidas numerusas damondas ord il miez.

Damai che la lavur ruassava ha el empruau da declarar la producziun da tschugalatas da tuttas uisas ed ils dultschergnems cun maschinas ruassontas. L'entira tecnica ei grondiusa cun maschinas exclusivas per sia producziun.

En ina alzada pli afuns sefa la producziun dallas tuortinas. Cun quellas ha quasi tut entschiet ed il process da svilup ei staus liungs. El raquenta dalla lavur che sto vegnir fatga per insumma saver vender ils products. Buca tut ei adina iu rodund, mo era cun ils sbagls ei la fatschenta daventada ferma. Varga 40 personas lavuran pil reussir dalla producziun. Las dimensiuns da producziun ein strusch da capir e fan impressiun. En ina stanza gest dasperas vegnan lu las tuortinas pachetadas. Las maschinas fan tut e la lavur da quellas ei immens productiva ed impressiunonta. Gronds camiuns cun cargunas dallas uisas bandunan lu la fatschenta per contonscher la clientela ora el mund.

Igl ei en tutta cass stau ina exclusiva e reussida presentaziun entras il Reto. Nus tuts essan zaco sesenti sco ils ventireivels che vein astgau prender part a quella guida. Ils participonts han remunerau cun in ferm applaus ed il Reto ha engraziiau a nus tuts cun ina pachet tuortinas ed in bien caffè el Dulezi. Tarcisi Hendry dil Forum cultural Tujetsch ha engraziuau al Reto cun in mudest present ed als participonts e participontas per lur preschientscha.